

ԵԹԻՄ ՏՂԱՆ / Հայ ժողովրդական հեքիաթներ, Հատոր VIII / Գուգարք (Լոռի), Լոռու բարձրադպրոց (խոսվածք)

Մի եթիմ տղա յա ըլըմ: Դա գնըմ ա, թե մի գործ գոնի, մի գեղըմ մուրը վրա յա հասնըմ: Շատ ըմանչկոտ ա ըլըմ, ըմանչըմ ա, թե մի տեղ դոնախ ըլի, էնա գնըմ ա մի գրեզմանոցըմ, գրեզմանի քարի տըկին կուչ գալի: Մին էլ տենըմ ա, որ մի մարթ մի մեշոկով բերուց մի բան վեր դրուց, ֆողը փորեց ու էդ բանը թաղեց, եդ-եդ գնաց: Նա որ գնըմ ա, են թաղած բանը ծվըմ ա, ճչըմ ա թե. «Ինձ քոմակ արեք, ձեզ մատաղ, ես սաղ եմ, ինձ ազատեցեք»:

Էդ տղեն գնըմ ա ֆողը եդ ա ածըմ, հանըմ ա, տենըմ, որ մի սիրուն ախչիկ ա, կոխկըմը խնչալով տված ա, հմա ինքը մեռել չի:

Դու մի ասիլ էդ ախչիկա հերը տանը չի էլած ըլըմ, ուրիշ տեղ ա գնացած ըլըմ, դրանց նոքարն էլ աչկն ա դրած ըլըմ ախչիկա հոր ապրուսի վրա, էդ ախչկանն սպանըմ ա, որ ինքը չկել հոր գալը ապրուստը գողանում ա: Եդնա գողանըմ ա, որ հերը գալիս ա, ասըմ.— Դաչաղնին էկան, ախչկանդ փախցրին, տունն էլ թլանեցին տարան:

Էն եթիմ տղեն էն ախչկանը հանըմ ա, իրան էլ մի պատառոտված շաքիք ա ունենըմ, նրա յարենին փթաթորըմ ա: Եդնա էդ ախչիկն էդ տղին ասըմ ա.— Ես քի քիր, դուն էլ ինձ ախպեր, ուր գնըմ ես ինձ էլ տար:

Էնա դրանք վեր են կենըմ, գնըմ են մի ծմակի միջի տափ են շինըմ, կենըմ:

Մի երկու օր կնանչով-բանով ապրըմ են, եդնա էդ ախչիկն ասըմ ա.— Սհե ապրիլ չի ըլի:

Դա իրա մազերի միջին անգին քար ա ունենըմ թաքուն, հանըմ ա, էդ տղին ա տալի, ասըմ ա.— Գնա մեզ հմար ուտելու բան ու ման էլ առ, երկու ձեռք տղամարթի շոր էլ առ, իրար նման բի, երկու հատ էլ ձի առ, իրա թամբովն ու սարքովը վի կալ բի:

Տղեն թաքուն տենում ա, որ ըտոնք մազերիցը հանեց, էդ մազերը կլուեց գլխին կոս արավ:

Եդնա դա գնըմ ա առնըմ, ինչ որ ասած ա ըլըմ, բերըմ ա: Դրանք երկուսն էլ հաքնվըմ են, ուտըմ են, կշտանըմ, ձիանուն վեր են ըլըմ, գնըմ են մի ըշխարի վրա: Շատ են գնըմ, քիչ են գնըմ, իրանք գիտեն, գնըմ են մի թալա հասնըմ: Բեզարած են ըլըմ, վեր են գալի դինջանալու: Հաց ու մաց են ուտըմ, դինջանըմ են, եդնա էդ ախչիկը շատ ա բեզարած ըլըմ, զլուխը դնըմ ա էդ տղի ծնկան վրա ու քնըմ: Տղեն մազերը քանդըմ ա, ասըմ ա՝ հլա տենամ ինչ կա սրա մազերըմը: Քանդըմ ա, տենըմ անգին քարերը հլե-նհե վլվլում են: Ձեռին նհե բռնած թմաշ անելիս ա ըլըմ, էն կռնից մի դուգդուն գալիս ա կտըմ ու թոչըմ: Դա մընըմ ա սլարած:

Ասըմ ա.— Հըմի ի՞նչ անեմ, ի՞նչ չի անեմ, ես ամոթիցը գետին կմտնիմ, որ զարթնի:

Շատ ա մտկի ընգնըմ, վերջն ասըմ ա.— Էլ ես սրա ըրեսին կենալ չեմ:

Ախչկա գլուխը դնըմ ա մի քարի վրա, ձիանն էլ, ամեն ինչ էլ թողըմ ա, հաքի շորերն էլ հանըմ ա, թողում ու գնըմ, ասըմ ա. «Որ վե կենա, ես ի՞նչ ջուղաբ տամ, կասե դուն ես գողացել»:

Ախչիկը վե ա կենըմ, տենըմ ա՝ տղեն ըտի չի, էնա ձեռքը գլխին ա տանըմ, տենըմ ա անգին քարերն էլ չեն ըտի, ասըմ ա,— Վա յ, վա յ, վա յ, ընդուր են ասել, թե հում կաթնակերին էհտիբար չկա, վե յա կալել ու գնացել:

Հմա էդ որ տենըմ ա համ ձիանն են ընտի, համ էլ շորերն ա հանել թողել, մնըմ ա հուշ էլած: Էդ ձիանուն նստըմ ա, մինն էլ քաշելով, գնըմ ա հասնըմ մի քաղաքի դրադ, ըտի ձիանը ծախըմ ա, գնըմ ա մի դուքան ա մտնըմ, ասըմ ա.— Ինձ մի գործ տվեք ես էլ աշխատեմ:

Ասըմ են.— Անըմըդ ի՞նչ ա:

Ասըմ ա.— Հալվաչի Գոգալ:

Ասըմ են.— Կարա u հալվա շինես:

Ասըմ ա.— Հա:

Էնա դրան ըտտե ասըմ են. «Դե հալվա շինե»: Դա հալվա յա շինըմ, ծախըմ:

Էն եթիմ տղեն էլ վե յա կենըմ, գնըմ ա մի հարուստ մարթի տանը նոքար ա ըլըմ: Տիե մի քանի վախտ կենըմ ա, եղնա էդ տղեն դրան շատ բանացնելիս ա ըլըմ, հախ տալիս չի ըլըմ:

Օրենը մի կտոր չոր հաց ա տալի, ասըմ ա.— Բանի:

Դա որ տենըմ ա իրան տիե գեշ են մտիկ անըմ հա, ասըմ ա.— Թքեմ սրանց տված հախի վրա, լավն են ա գնամ ուրիշ տեղ ըշխատեմ, բալի տուն ու տեղ դառնամ:

Ուզըմ ա գնա, աղի կնիկն ասըմ ա.— Ո՞ւր ես գնըմ:

Ասըմ ա.— Էլ կենըմ չեմ:

Ասըմ ա.— Դե գնա մեր բաղըմը մի չոր ծառ կա, կտրե, ջարդե, հաց տեմ թխիլ. ըստվա քո կերածի հախն էլ ա հանե, եղնա ուր ուզում ես ջհանդամվի (Վայ տամ նրա գլուխը, մթամ նաչարին հաց ա տված ըլըմ, էն էլ ըրեստվն ա տալի):

Էդ նաչարը բան չի ասըմ, անսաս գընըմ ա կտրըմ: Կտրելիս տենըմ ա էն դուզդունը բլիցը թռավ:

Գնըմ ա տենըմ, որ էն բլըմը մի բուն կա շինած, էն անգին քարերն էլ միջին դրած ա: Անգին քարը վեր ա ունըմ, վեր գալի էդ ծառը կտրըմ ա, փետը ջարթըմ, գալիս ա ասըմ.— Խազեին, փետը հազիր ա:

Խազեինի կնիկը բերըմ ա հաց ա տալի, ասըմ ա.— Ճամփըմը կուտես:

Դա վրա ա անըմ էդ հացը ու ասըմ ա.— Շնորհակալ եմ ձեր լավութենիցը, ես ինձ հմար ուտելու հաց կգտնեմ:

Գնըմ ա տենըմ էրկու մարթ են գնըմ:

Ասըմ ա.— Ո՞ւր եք գնըմ:

Ասըմ են.— Սիե-սիե գնըմ ենք մեր կորուստը գտնելու:

Դրանցից մինը էն ախչկա հերն ա ըլում, մինն էլ էն նոքարը, որ թաղել էր:

Նաչարի հերը հենց գիտենըմ ա, թե ըդորթ որ դաչաղնին են տարել, նոքարն էլ հետը հնգերացել ա, որ իրա վրա կարծիք չի անի, գնըմ են ման գալու:

Դա ասըմ ա.— Դե էրկուսը չի ըլեք, յիրեքն ըլինք, գնանք, ես էլ եմ գալի:

Վի են կենըմ իրար հետ գնըմ են: Գնըմ են հասնըմ էն քաղաքը, որդի որ Հալվաչի Գոզալն ա:

Գնըմ են թուշ Գոզալի դուքանի դռանը վեր գալի, ըստի սոված են ըլլում, Գոզալիցը հալվա են առնըմ, ուտըմ, եղնա էդ Գոզալը դիանց ճանչըմ ա:

Ասըմ ա.— Ո՞ւր եք գնըմ:

Ասըմ են.— Սիե-սիե, գնըմ ենք մեր կորուստի եղնա:

Ասըմ ա.— Էս ա մթնել ա, էկեք իմ տանը դոնախ էլեք, ըռավոտը կլիսանա, կգնաք ուր ուզըմ էք:

Դրանց տանըմ ա դոնախ անըմ, ետնա գրից են անըմ, դեսից-դենից խոսըմ են, առակ են ասըմ, էդ Գոզալին ասըմ են մի նաղլ էլ դու արա, քուններուս տանըմ չի:

Եղնա էդ Գոզալը իրա գլխի էկածնին պատմութին ա անըմ, հըմա ասըմ չի, թե ինքն ա:

Որ պրծնըմ ա, հերը ճանչըմ ա.— Բալա ջան, էդ դո՞ւն ես, էլ խի՞ ես ինձ չըչարում:

Վի յա կենըմ փթաթվըմ ա, պչպչոտվըմ են, էն քոռ մահի տարած նոքարն, ընտի շան պես գլխի ա ըլըմ, վեր ա կենըմ, թե փախչի, եթիմ տղեն աղաքը կտրըմ ա, ասըմ ա յավաշ:

Եղնա էդ տղեն հանըմ ա, էն անգին քարերը ախչրկա ըղաքին վեր ա ածըմ:

Ասըմ ա.— Բա դուն ինձ լավութին արիր, ինձ էն ըշխարից հանեցիր, վերջը խի՞ տիե նամարդութին արիր, ինձ թողիր էն չուլի կիսըմը, վի կալար դրանք գնացիր:

Նոր էդ տղեն հանգամանքնին ասըմ ա, ասըմ ա սիե-սիե: Էն ա գալիս ու էդ տղին էլ ա բարովում:

Եղնա հերը էդ նոքարին ասըմ ա.— Տո դուռումսադ, քի ախշիկ եմ պահ տվե՞լ, թե դու տհե բաներ անես:

Դրա լիզուն բոնըվըմ ա:

Ախշիկն աղաք ա գալի, ասըմ ա.— Բախշե, հայրի՛կ, դա առանց էն էլ իրա ըռխեվերութենով լավ օր չի տենալ:

Էն եթիմ տղեն էլ ա տհենց ասըմ, հերը բախշըմ ա:

Եղնա էդ տղին ասըմ ա.— Դու որ իմ բալին ազատել ես, ինձ մենձ լավութին ես արել, հմի ասա, ինչո՞վ կարամ քու լավութենի տկիցը դուս գամ:

Ասըմ ա.— Ես մի բան էլ ա ուզըմ չեմ:

Էն նոքարին որ բախշըմ են, աղաք ա գալի ասըմ ա.— Դրանք իրար դամաթ են, արժան են իրար:

Էն եթիմ տղեն ասըմ ա.— Դե որ տհենց ա, դու էլ մեր քավորը կլիս: Նոր ըտի դրանք ուրխանըմ են: Էն նոքարի հետ էլ հերը բարըշըմ ա, ասըմ.— Որ իմ բալեն ու փեսեն քի բախշըմ են, ես էլ եմ բախշըմ:

Բերըմ են դրանց հրսանիք անըմ, օխտն օր, օխտը քշեր ածըմ են, նրանք հասնըմ են իրանց մուրազին, դուք էլ հասնեք ձեր մուրազին: